

夏
峯
先
生
集

夏峯先生集卷之三

容城孫奇逢啟泰著

大梁書院重刊

記

乙丙記事

乙丙逆璫魏忠賢竊柄誅殺異己左僉院光斗吏科都
魏大中與副院楊漣同時被逮余不佞素辱左魏之知
副院向二君亦有知己言逮未到魏科都長子學淨先
至有緹縈上書之志攜其父手札二一寄鹿化麟一寄
余大要謂覆巢之下無完卵周文選順昌遣使護學淨

亦有字遺職方鹿善繼曰世事如此使人百端交集乃以魏科都之苦節亦竟不免被逮之日士民號泣遮道者數萬計家無百金之產士大夫醵金數百始能啟行冤憤之氣緹騎感動今其長公隨乃翁以行而道孤援絕欲仗公爲之覆庇更厚望於孝廉孫公愚謂兩公皆以千古自期必能左右魏公子不至失所令魏科都得生入里門不至終成漢宋諸賢之禍惟兩公心照臨指慘然腸斷偶憶昔人一身作客如張儉四海何人是公融不能不重感足下高誼也時善繼以職方贊孫隱齋

承宗於山海左魏諸君皆平時契交故鹿太公正毅然
爲之設榻凡脫禍解厄不獨破家不恤亦且身命不顧
左僉院亦先有使以二札遺余暨鹿化麟略云二君道
義之雅須得一人親詣關門知秦廷之哭不同于泛泛
翼日化麟暨余季弟奇彥遂入關門余上書閣部略云
左魏諸君子清風大節必不染指以庇罪人此何待言
獨以善類之宗功臣之首橫被奇冤自非有胸無心誰
不扼腕維桑與梓固浮邱舊履地也遺愛在人不止門
牆之士興歌黃鳥能不慨然昔盧次楨一莽男子耳謝

茂秦以眇布衣行哭于燕市謂元美等曰諸君子不生
爲盧生地乃從千載下哀湘而弔賈乎李獻吉在獄何
仲然致書楊遂庵求爲引手康德涵義急同調至不自
愛其名浮邱廓園之品固當直踞獻吉何次梗敢望某
無能哭訴尙負慙于茂秦閣下功德前無遂庵憐才扶
世之感稍一斡旋且有出德涵上者況諸君子以道義
臭味之雅受知於閣下最深且久豈無意乎又聞任邱
公力可以爲德涵倘閣下以此事屬之當必有濟化麟
奇彥抵關善繼與閣部日夕謀所以脫諸君之難後以

巡視薊門一帶請覲君面議方略此亦其意中一事也
異已者謂閣部提關門兵來清君側善繼爲謀主逆賢
繞御榻而哭夜半差官奉嚴旨止之至通州而返左僉
院過白溝先有字遺張果中期余相會余至而胡向化
亦至坐閒環伺而窺聽者皆緹騎也僉院舉止自若徐
曰弟被逮出門八十歲老父母一瘳絕地此情何堪言
之泣下余曰老公祖朝家大老雨露雷霆總屬聖恩主
張須要蚤定僉院爲收淚以謝謂向化曰僕被逮人多
避之公冑來過視便見友誼轉刻不敢勞再顧也邀予

再會於公署大門內月下相向謂余曰適大金吾公子
云當事定欲死楊大洪大洪死我輩豈能獨生余曰事
屬一體義自相關時奉聖客氏弟光先因素不禮于士
君子每謂其善者曰被逮諸老一時名賢我若婉轉其
中庶幾有濟余時舉此言以告左左曰可向婦人女子
求活耶殊非丈夫余曰公不必問第聽之而已左又云
有一王姓者相從于患難之中煩覓一枝聊爲棲止余
究其人乃云卽其八弟光明也因引與魏學洺同住鹿
太公莊余草堂地僻築淺兩家子弟雖不棄而見過然

不肯久留也左過白溝之二日科都魏亦逮至爲詢果
中果中正走關門探消息欲假半日遲余而緹騎苦不
肯容魏厲聲斥之怏怏而去時予正有事就學伊錯此
遂無及再晤矣左魏旣下獄掠追甚嚴三日一比五日
一奏意固不肯於完贖也學伊每絮泣食不下咽必欲
入京伺動靜又苦此身無安頓處乃易姓名爲金子陶
攜二僕余仲兄奇遇伴之往伊暫留良鄉道中仲兄暨
一僕入都住牛俊臣家其僕自獄中往返朝出暮歸迄
今主人尙未知爲魏使也一日魏使過錦衣王莅民王

曰令汝小主人自來他住良鄉某處我盡知之但戒嚴緝拿諸役不明言耳洵因潛過王王素交左魏乃披赤相示洵歸與余曰王君可稱宇內膽氣男子就中蓋多有周旋之力焉左擬贖二萬魏五千立限嚴比南來者未必卽至且魏介節之士家園蕭索鹿太公率同志者力爲區處炎蒸策蹇贖金于二百里外共得三百餘兩其高義者則有王永吉之百金楊光夔之五十金杜濂崔庚范士楫等數人亦各數金其餘三金二金者亦不下數十人嗟乎義者寡財財者寡義從古已然又何憾

于今之世哉永吉時爲定興令洵曾遺一札余託楊孝
廉茂代致永吉因期余過茂處出百金于袖中付余曰
金不于此處用便爲天地間無益之物余急付魏使北
上隨聞科都斃杖下二日矣洵已踉蹌扶柩去時爲洵
下榻者固安有賈三槐定興有許顯達皆取以爲入都
便路僉院舊爲屯田使曾以十三場子粒爲定興開永
賴之利又曾爲學使者簡拔高等悉知名士太公一集
鄉民約凡十三場子粒每畝捐錢一文便可得數十萬
緡一集青衿約各隨心力不拘三錢二錢一兩半兩便

可得數百金聲息所通各處俱有任事者任邱若張若
邊父子兄弟多者數十金少者數金清苑賈爾霖雄縣
蘇湯宇新安李衷實陳謬言李童梁大用容城崔庚胡
向化王拱極新城張果中孔心學各集同志各攜數十
金數日之內義輓數百果中拱極接替爲送甫至而僉
院同科都俱斃杖下矣風聲一播道路聞傳長安中貴
有指而目之者曰鹿封君爲左家斂銀若干恐不利親
友中每作危語勸阻之太公曰不知命無以爲君子我
固籌之熟矣太公時謂余曰左魏二公與小兒素稱道

義交今急來相投而中道畏避不獨衰朽不齒於人小兒亦何以立於天地閒乎吾嘗見古人以死殉義者未嘗不豔稱之今先事而自作迴避實愧此鬚眉余曰拚此一路便無不可爲之事今日無不盡心免得異日自生後悔左旣斃除楊光夔之百二十金仲兄暨王拱極親付盛千齡餘銀各照原單給散各家有情不容已思欲伸一翼於途次者尙存有五十金逾年而周文選又逮至矣時鹿職方已從關門入里周之友朱祖文字完天攜其手書二一付職方一示余其言曰數年濶別時

勞魂夢弟忽罹此所謂雷霆雨露均屬聖恩也在臣子
只應歡喜順受臣罪當誅今天王聖明古人之言殆非
欺我也弱子同來因其中途患病反增一累遂力遣之
歸家所仗止一密友朱完天乞兄進而教之知不須弟
屬也此事下獄情形俱前番之所已經不必然之頭緒
一切可省只有去訪王荏民一著不意王出都而周亦
擬贓五千周之貧固不減于魏也祖文回囊與太公所
計盡無遺者職方又熟籌而詳計之那移借貸共贖百
餘金又張希舉之八十羅萬象之五十茅元儀三十王

永吉二十皆義助也職方又遺字范質公景文亦得二百時朱不耐勞余季弟奇彥暨鹿僕趙順送之京師而周又斃杖下矣嗟乎周之死去左魏僅一年聞其死也齒牙盡落身無完膚諸君子皆當世第一流人致命遂志自足照耀今古吾獨于鹿太公不能不心醉而神服也大凡一時偶激之意氣有利無害之肝腸中士皆可勉能至於實費已之財物而意氣半灰矣實臨已之利害而肝腸全阻矣再至於心力俱困歲月浸淫而意氣肝腸卒不覺其潛移而默換矣太公之周旋三君子也

冒暑經寒以至典衣鬻產而毫無轉念至對學伊諸人之哽咽而爲之廢食廢寢枯形傷神真古仁人之用情哉此皆其小者也周之死實以與魏結親之故職方於三君子皆莫逆而權璫親信之人李朝欽者其家與太公比鄰三君子之子弟故人居者行着絡繹于途且有一二宵人播傳訛言旦暮之禍俱不可測而余微窺太公之神情氣彌銳骨彌勁誠有視死而如飴者學伊有詩百韻以贈亦略見其概矣太公於余相信而過愛三君之難未嘗一事不與謀一言不相商故能深窺其底

裏至若職方立身立朝祥麟瑞鳳有目共睹不沾沾以
節俠見化麟意氣肝腸不愧祖父初爲左僉院之難走
關門後爲周文選贖金奔馳籌畫直無不竭之心力一
堂三世雅有同心余謂江村片地旣不受惡璫之污穢
又不受惡璫之摧殘可謂以奇人獲清福矣余不佞以
一身交鹿氏祖孫父子之間且親承左魏周三君子之
盼睐智短才疎灑血無地幸余兄若弟頗具胸臆初仲
兄伴學涉入都而苦心極慮不寐者數晝夜再爲僉院
公攜金往返於酷炎烈日之中渴熱欲死左公出片紙

於獄令其僕屬仲兄面致光夔意欲再爲措處暫免追
比仲兄急過商之而光夔以其堂叔生員震宇扮作家
人送百七十金于二百里外堂兄光契腸亦熱且慙思
光夔多方轉聚而金無用處矣後季弟奇彥與鹿使送
范質公之義助歸至蘆溝橋遭河水泛漲居人一夜皆
葬魚腹中季弟幾不免絕粒步行道途阻溺余爲偵兄
若弟之微意亦無幾微退轉後完天有字寄季弟云如
此酷暑重勞奔馳復損清士之素此衷已不安之極乃
聞復爲河伯所用者累日幾爲不免總某之畏縮憚勞

致累知已弟則何以自立矣此事而始終共之者張果中果中住白溝爲通衢諸家子弟必先往來于此諸家行李必先安頓于此果中暨其弟果正爲之供應安置俱有作用而心腸皎然此吾燕趙中之劇孟家也又得之王生拱極極于鄉曲中未甚著名然氣之所激力能孤往一日爲僉院公追比期迫攜金往送二百四十里一日卽至且出門之時有客滿堂余爲之代陪極卽就道妻子亦不知所往諸青衿爲左公義輾完贖極一貧士也爲之質衣并其妻子簪珥共得十金以助職方曾

有聯贈云居君子鄉從容如入芝蘭室讀俠客傳慷慨
猶存燕趙風太公之周旋三君子也左右夾助之力又
多得之杜濂其人固篤厚君子家又素豐一切緩急之
需時取給焉或值其乏則毅然爲之代處太公猶子善
言爲學淨捐金五兩其銀以賣豕得之而色微不足乃
分外加耗二錢嗟乎魏生瀛海崔產薊門古燕趙之地
幾無靈矣然有鹿太公一流人爲之扶陽抑陰置身家
性命于度外則慷慨悲歌固不盡泯于朝而實留于野
者多矣就中有一念一事由衷而好義者情節尙多遺

讀此其大端云爾率爲之記余於朱完天更不能不再
致意焉夫學泚之隨父光明之隨兄孝子悌弟之情猶
曰天性不可已完天于周非有不可解之誼也以一顯
一時之交共生死死之事間關數千里閱盡風波備
經冷暖卒無纖毫灰心後因輟金于鹿定興范吳橋兩
地奔馳遂于周蓼洲之死也未及收屍又未得護喪慙
負之極若不自比于人如完天者古色照人真不自負
以負友者也吾鄉不乏有心人當自有爲之立傳者附
錄于此時戊辰七月

留村古槐記

兵燹以來廬舍已非雲樹改色數百里相望喬木之存
焉者寡矣高君似斗謂其鄉留村之北嶽廟有古槐一
株厯年不知幾百相傳其初廟僧自袖中攜來手植祠
前日暮月盛漸至十餘圍高可數丈蔭可數十丈儼然
稱邑中盛槩焉一日攜壺榼邀余偕友人坐飲其下夷
猶磅礴旣不苦日氣之侵又偏覺清風之動俟爾飛雲
過雨令人忘暑且令人忘倦乃知古來達人曠士風景
可樂置酒言咏終日留連而不忍去其中之所得必有

深焉者矣因憶此樹幾歷歲月幾經風霜而枝繁葉潤如蓋如帷諸君子之高會飲於斯憩於斯者不知凡幾今日之孫曾復飲於斯憩於斯者又不知凡幾則此槐也蓋不啻召伯之棠世世護惜勿忍傷也王晉公植三槐於庭謂子孫必有三公是猶以一家私之也孰如此槐留村人人借其蔭渥城人人借其蔭吾黨士凡百里而聚於斯千里而聚於斯者莫不人人借其蔭區區一喬木云乎哉獨是余行年六十兵戈烽燹聚散興衰身之所歷而目之所擊者已不堪彈指而數況數百年海

田之變換人心風俗之遷流其能一一問諸古槐否

一茅記

余性迂疎素厭喧囂適移居夏峯目不睹冠蓋耳不聞
鳴騶意頗間適然室近內頭畜出入農器靡雜老農雖
不厭此亦少幽致奏兒於占象屯室東傍廢地一區築
牆覆茅僅可容膝軒前棗榴數株雜以瓜蔓豆棚兩過
風清各含生意牆外有田百畝藝黍植麻可農可圃斯
時也假令樊遲爲子御而適衛其所請學者當更殷夫
子定不曰小人哉而曰隱者也古今悠悠窮達無閒爾

等耕于此讀于此當曠然于一茅之外立六通四達之
基余甯直憩此忘暑且將寤寐上古焉卽名其室曰一
茅仍故園之舊也

重修靜修先生祠記

先生祠在吾容者有二邑祠奉勅專額蒸嘗具備一在
潯市墓傍昔年余約同志創成者也邑祠修葺者屢今
復增入配饗九人合而新之適余移家蘇門胡生或過
而俾記其顛末余先生鄉後學也沐浴遺澤竊負私淑
之列烏容無言自中夏陷於金百年而後元河北爲金

元域而先生之先世爲金元人其仕宦於金元者已久
先生於宋無故主故土之誼百世後以不仕元高先生
非以先生爲有宋之孤臣也至摘渡江賦爲幸宋之亡
則又失先生之心矣悠悠之口浮議未清劉宗伯愷已
言其概余有渡江賦辨愷言輕恐不足取信於後之君
子崔文敏銑有言晉幼安之辟魏存漢也靜修之辭元
存中國也又言劉子惔元伐宋乃賦渡江其徒申之曰
哀之也題梅曰西風吹落戰塵沙夢想西湖處士家曰
恐江南春滅猶夫賦也邱仲深昧稽實而肆臆貶不亦

冤乎許平仲與先生同應召過客城商出處先生以行道推許子而以尊道自任程朱之學禁於朱而平仲興之儒者之道滅於金而平仲起之至問伐宋則不對先生渡江賦爲有宋求自固之策正所以存中國之義先生實抱深心而其情更苦耳王景略不忍滅晉而謂先生幸宋之亡乎先生研精聖典興起絕學隱然係斯世斯民之重聲之爲詩綴之成文其詞如西山之歌其義祖春秋之旨惜其四書語錄久矣佚失而俎豆之典缺焉未備豈謂世衰道喪遂以天下無真儒耶先生以元

人不仕元則元不得而有之清而通和而介在聖門則
閔子於宋儒則純公故薛文清有言劉靜修百世師也
當日雖乏君臣之魚水卻得師弟之嚶鳴雷溪之賓先
生之涑澗也三臺之里先生之杏壇也藉其人日與把
臂行吟則有梁至剛肥遯自甘嗜學不厭先生嘗爲南
溪老人行贈之其及門羽翼斯道者則有梁師恭以經
行見徵侍講弟師安建廟立學廣敷師訓王綱至孝
成居喪哀毀滅性先生哭以詩復銘其墓劉英梁
蒙王果李貞皆負笈從遊爲建書院於三臺人各有

學足相成當時諸君子繪像兩廡與於配饗之列獨梁
師安則據遺文事蹟而補之者也闔縣紳士稽俎豆之
廢佚深弔古之餘恫合詞而請於官師爲復此祀典也
豈苟焉已哉先是辛未先生墓祠成同人以明監丞李
仲處士張紹烈屢有疏爲先生請從祀孔廟因得旨建
祠厥功大矣僉議配饗諸大夫曰可繼丙子考之誌記
元五經進士胡炳南則舊所配饗者復補入今此數公
者親承教旨道合於先生有功於先生後進者登堂而
躬炙者出室烏足安先生之靈爽而慰九人者之精英

邪竊思鄒魯文學其天性孔孟之鄉也教化隆昌斯文蔚起先生及門者九人私淑者三人綱維名教啟佑懦頑四海內外猶將喁喁向風況生先生之鄉而景行仰止寤寐不遠者乎先生身在運會之中道超運會之外教授燕趙成就英才甚多視幼安生爲漢民不欲乘亂而在奸邪以覆之者不可同日語周元公爲諸儒冠其從祀獨後於諸儒則造愈高而知益寡先生洵無憾於今之世矣是役也邑令靳君山彥主持其事學博丁君耀亢張君變暨紳衿贊襄其成厥而始終拮据以倡其議

者胡君或也祠葺於癸巳之春記成於甲午之夏

重修忠愍祠記

楊忠愍先生賜祠之在保定暨容城與墓門者有三而郡西郭之有祠則自太守武公文達始迄今五十餘年矣敗瓦頽垣不可以妥靈爽仰止者無所寄其馮弔歲甲辰余北歸過上谷魏子一鰲言之慨然而力未能也嗣常公大忠以名進士來佐郡慨爲修復魏子得拮据贊其成寓書蘇門來問記夫先生之名卽深山窮谷販夫野老無不知之某又何容贅一辭余維先生所學隱

而未彰今日修復之舉得觀厥成梓里後學之大幸也
今之仰止先生者大都曰忠諫而死先生力欲除奸反
以觸奸而死卒以先生一死而奸乃誅並誅其逆子黨
惡先生之以死諫可謂忠矣而忠可謂仁矣余竊窺先
生之學得之造化之源非獨以忠節見也先生年譜紀
從韓苑洛邪彥受律呂之學三月而得其數乃播之聲
音各相和諧苑洛欲制十二律之管每管備五音七聲
各成一調先生精思連三日夜而樂成嗚呼先生豈僅
以忠節見哉卽此可概其全體矣世之談聖學者必稱

六經然五經各有專業而樂則滅絕無傳論治法者必
對舉禮樂然議禮者於天秩不易之外猶深求立異可
喜之說至於樂則廢棄不講全德之微風俗之敝職此
之故先生序志樂有云信手拈來觸處皆合樂之爲道
嗚呼先生豈僅以樂見哉黃帝制律呂與伏羲畫卦大
禹衍疇同功然卦疇得程朱諸子而始著律呂得先生
而始明則其功豈曰小補云乎或曰美里之厄正欲行
大易以利民用正士之囚復欲陳洪範以正民彝先生
當日一耶署耳履虎尾而見咥蹈堅冰而遂隕毋乃非

用易衍疇之旨乎余曰否否體貴守其常用貴達其變
先生當世廟無事時分宜之奸尙欲收先生以爲用重
陰肆蔽五行汨陳而當世之大臣曾無一人正其罪者
嗚呼澤下水決溝壑發志士之觀木槁澤中過涉存獨
立之意事君值泰否之會旣知其旤敗必反覆陳諫諫
之可則君享其安諫之不可則身與其辱辱之不可而
後去之去之不可而後死之古之聖人贊易繫辭未嘗
不通於義命非守常達變之道乎先生所云信手拈來
觸處皆合樂之爲道正所以合用易陳疇之道也先生

在狄道時爲道統祠由羲黃周孔以至周程張朱劉靜
修薛文清亦與焉顛沛遷謫番漢難理之地而猶諄諄
以興學自任先生所得力者又豈特律呂之自見邪常
公今日修復之舉不獨誅千古殺諫臣之奸慝愧千古
不指佞之言官正欲以興千古不澌滅之學俟世道人
心將於此胥賴焉乃述先生未彰之學術用告後世至
修建之次第工料之補葺祠宇並廊廡大門儀門皆一
時修復牆圍以甎坊樹以木功多而費省巍然稱鉅觀
焉是役也常公捐俸首倡而郡縣長吏與縉紳士庶皆

欣然出囊橐以應至始終區畫半載拮据者則魏子一鰲與劉生元吉也朝夕催督出入經營者則薛生與潘善人也經始於乙巳落成於丙午例得泐石

重修太室法王寺記

太室之中有所謂大法王寺者由來舊矣自兵燹頻仍梵刹佛宇雜之荆榛瓦礫釋氏適菴自江右經過駐錫於此覆上誅茅蕭然自適嘗過予夏峯叩其所學蓋釋其服而儒其心者也心竊許之辛亥冬金壇蔣虎臣督學事竣迂道過我將渡黃河問二室之勝因訪適菴于

法王寺與語連日夜傾倒之移書中州學使史君雲次
暨藩臬諸使者共醵金飭其舊刹與入靜接眾之所規
制宏壯亦云備矣工既訖適菴走字乞余言以勒之石
余迂且老素守先儒之訓於佛學未有所窺烏可以爲
此言因憶高陽孫文正曾爲余言與一宰官暨一老衲
遊西山坐中老衲講中庸宰官講楞嚴意興勃勃不自
已兩人謂文正何無一言文正曰適見一異事秀才忽
變爲僧僧忽變爲秀才兩人大笑而去虎臣究心內典
所至與方外爲緣而其行徑儼然一苦行頭陀毫無沾

滯于去來之故眞所謂秀才而僧者適菴制心和平歸
依儒業所至與臣言忠與子言孝實致力于日用倫常
閒其友嘗舉許文正能令老僧歸儒適菴默然笑其非
知我者余知其意有在矣余嘗與友人言法各爲用至
學術之辨毫釐千里不敢稍有馳越以問後人擬議之
端獨是入世出世之界天地生生之心分焉生生者太
極也物物各具一太極萬物共分一太極人日由其中
而不自知聖人見其道于太極流行之際佛氏見其道
于太極寂靜之中流行之際理歸于有而實寂靜之中

理源于無而虛有無虛實之際正毫釐之辨也適菴能從無而見其有從虛而見其實此老夫之所望者至修建始末雲次已有貞珉紀不再贅

重建大梁烈女祠記

大梁之西郭舊有六烈女祠李公空同爲文記其顛末蓋天順正德間事也崇禎末年大梁沒于水祠與碑皆爲地中泥後三十年土人掘地得之鬻于僧值剗磨其字盧龍韓子鼎業見而傷之告于予因聞于王君蓼航贖以金樹于信陵君祠右蓼航復爲詩紀其事又二年

上谷魏子一鰲過祠中見烈女碑謂風化所關擬別爲
祠時有王烈女未嫁殉夫事言於學使史君雲次將配
六烈女而七以候旌未果又一年余季兒博雅復言于
河使崔君惕菴相地上方寺東隅與信陵祠并峙會河
使臬金陵將行屬方伯金君治公始得落成七烈女靈
爽相聚于一堂風教頓興于千古衰朽喜諸君樂善之
有同心方伯公見義之能獨力韓子乞一言勒之石余
謂陳烈女未結褵而剪髮殉夫至五十三年始遂初志
張爲婦一載高甫三月年俱十九耳能矢志相從百折

不易劉氏引梁上于二縵王媛繫樹間之三尺至張婦
痛夫田銳孝行之冤獨反覆以伸大義終亦以自縊死
六烈女畢命雖有後先而從一則無二致其爲維綱常
麗照臨空同之文言之詳矣獨是運會遷流人心剝蝕
而聞風興起一念本于性生故在上之人倡之則爲風
在下之人效之則爲化家得之則風化在一家官表之
則風化在一國天子旌之則風化在天下史乘書之則
風化在千古可見人性皆善觸無不覺叩無不應所謂
王化起於閭門貞烈存於巾幗大梁一席地爲兩河表

率之區女之貞淑如此士風民俗不更可見邪卽如空
同子之文旣沒而復出閱世二百年沈埋三十載精光
所寄鬼神尙爲之護惜今當崇重節義之時復有王烈
女殉夫之事烈女父王碧字同邑于天祥將嫁而天祥
病逝女誓不他適先是天祥幼養于王姓娶婦生子烈
女取而養之有程嬰保孤之志已逾一年王姓竟奪之
去烈女遂投繯死是夜有星光墜其家亦異矣哉至誠
所感召前後同軌以愚夫愚婦之知能可爲參贊位育
之極至總不外性分之所固有凡在上之風教暨風俗

之醇篤其在此邪衰毫不文聊誌梗概祠成于甲寅秋九月冬十二月爲之記

論

尙論篇上

從古帝臣王佐雲龍風虎應運而興其主臣之際相須固殷卽素王絃誦以暨諸儒講習有不以朋來爲樂者乎得之爲帝王師不得與家人言禮讓一而已矣予嘗尙論古人凡可爲吾師爲吾友者彙之卷以爲耄年之助陶淵明集聖賢羣輔錄肇自燧人四佐伏羲六佐黃

帝七輔雖有所本然遠不可據諸不必爲吾師資者亦
不庸述也如高陽氏才子八人齊聖廣淵明允篤誠天
下之民謂之八凱高辛氏才子八人忠肅恭懿宣慈惠
和天下之民謂之八元見左傳季文子辭尙書九官論
語五臣楚辭八師總之五臣外益伯夷夔龍與垂耳至
舜之七友雄陶方回續牙伯陽東不訾秦不慮靈甫並
爲歷山雷澤之游見皇甫士安逸士傳與戰國策相應
文之四友武之十亂十亂之閔天太公望南宮适散宜
生卽四友也降而至於霸圖需才更殷劉琨詩曰重耳

任五臣五臣者狐偃趙衰顓頡魏武子司空季子從亡
五人晉文生十七年所得士也孔子四友六侍孟懿子
曰文王有疏附奔奏先後禦侮謂之四鄰夫子亦有四
鄰乎子曰吾有四友焉自吾得回門人益親是非疏附
乎自吾得賜遠方之士日至是非奔奏乎自吾得師前
有光後有輝是非先後乎自吾得由惡言不至於門是
非禦侮乎六侍者志意不立子路侍儀服不修公西華
侍禮不習子貢侍辭不辯宰我侍亡忽古今顏回侍節
小物冉伯牛侍曰吾以夫六子自厲也齊威王與魏惠

王論寶曰吾有疆場四臣檀子守南城則楚人不敢爲
寇東取泗上十二諸侯皆來朝盼子守高唐則魏人不
敢東漁於河黔夫守徐則燕人祭北門趙人祭西門徙
而從之者七十餘家種首使備盜賊則道不拾遺以此
爲寶將以照千乘豈直十二乘哉戰國四豪吾獨喜信
陵漢高三傑吾尤愛留侯商山四皓秦末隱上洛商山
並河內軹人疏廣疏受宣帝時授太子論語孝經朝廷
以爲榮各以老疾告退時人謂之二疏龔勝龔舍並楚
人皆治清節世號二龔汝南周燕少卿之五子子與子

羽子仲子明子良號曰五龍各居一里並以儒素退讓
爲業天下著姓鄧禹吳漢等河北二十八將光武所與
定天下張衡東京賦云受鉞四七共工以除河西五守
梁統庫鈞史苞竺曾辛彤時更始已爲赤眉所害隗囂
密有異志統等五人共推寶融爲河西大將軍內撫吏
民外禦寇戎東伐隗囂歸心世祖克建功業五處士豫
章徐穉京兆韋著汝南袁閎彭城姜肱潁川李曇汝南
太傅陳公時爲尙書令與諸尙書共薦此五人世號五
處士六孝廉周子居黃叔度艾伯堅郅伯向封武興盛

孔叔汝南太守李倬選此六人以應歲舉受版未行倬死子居等遂駐行喪倬妻於柩側下帷見之厲以宜行子居嘆曰不有行者莫宣公不有止者莫卹居於是與伯堅卽日辭行封黃四人留隨柩車大將軍竇武太傅陳蕃侍中劉淑時人尊爲三君曰天下忠誠竇游平天下義府陳仲舉天下德宏劉仲承李膺等八人爲八俊郭泰等八人爲八顧陳翔等八人爲八及度尙等八人爲八廚天下模楷李元禮天下和雍郭林宗此二人尤表表者故世稱李郭仙舟太邱長潁川陳寔字仲弓寔

子大鴻臚紀字元方紀弟司空掾諡字季方並以高名
號曰三君朗陵令穎川荀季和之八子儉伯慈緄仲慈
靖叔慈壽慈光汪孟慈爽慈明肅敬慈寡幼慈並有德
業時人號之八龍公沙紹字子起孚字允慈恪字允讓
遼字義則樊字義起北海公沙穆之五子並有令名京
師號曰公沙五龍天下無雙穆亦名士也膠東令盧洎
昭樂城令剛戴祈穎陰令剛徐晏涇令盧夏隱州別駕
劉彬並有異才皆稱神童當桓靈之世時人號爲濟北
五龍涼州三明太常燉煌張奐字然明度遼將軍安定

皇甫規字威明太尉武威段熲字紀明並著威名於桓
靈之世悉名士也韋氏三義韋權字孔衡弟瓚字孔玉
瓚弟矩字孔規太尉掾韋子才之三子皆修仁義兄弟
孝友逢盜賊一人病不能去兄弟相募兵至俱死時人
稱之

尙論篇下

孔融一門爭死張儉與魯國孔褒有舊亡抵褒不遇褒
弟融年十六匿之後事泄儉得亡走國相收褒融送獄
未知所坐融曰保納含藏者融也當坐褒曰彼來求我

非弟之過吏問其母母曰家事任長妾當其辜一門爭死郡縣疑不能決乃上讞之詔書竟坐褒平原相劉備少與河東關羽涿郡張飛相友善以羽飛爲別部司馬分統部曲備與二人寢則同牀恩若兄弟稠人廣坐侍立終日先主訪士於司馬徽徽曰儒生俗士豈識時務識時務者在乎俊傑此間自有伏龍鳳雛諸葛孔明龐士元也關羽馬超張飛黃忠趙雲時謂之五虎上將吾最服膺趙雲雲不欲以成都屋舍園田分賜諸將併諫先主伐吳曰國賊是曹操先滅魏則吳自服此大臣局

量不獨名將而已洛京傾覆中州士女避亂江左者眾
王導勸帝收其賢人刁協卞壺諸葛恢陳頴庾亮等辟
掾屬百餘時人謂之百六掾朝野傾心號爲仲父王謝
門庭貴盛子弟多才時人不敢輕與之議婚淝水奏捷
蘭亭修禊允矣佳子弟但亂臣賊子何代無之不意乃
在臣族茂宏亦岌岌已竹林七賢山濤阮籍嵇康有可
觀者伯倫輩酒酒忘身豈可與陶公共稱酒人也士行
有此孫殊可喜紀僧真有寵於齊王願就陛下乞爲士
大夫王使詣江謝至彼無所言相對久之呼左右曰移

吾牀達客士大夫之風節固如此哉唐以秦王世民爲
天策上將開館延賢杜如晦房喬等十八人並以本官
兼文學館學士士大夫得預其選者時人謂之登瀛洲
圖功臣長孫無忌等二十四人於凌煙閣按凌煙二十
四臣蓋象二十四氣所以輔天而宏化也長孫房杜諸
公開國保邦功雖大小不侔庶幾可當此選李勣贊立
武后侯君集張亮躬爲叛臣信乎知人之哲惟帝其難
之白居易清修忠諫元和以來名臣香山九老亦是暮
年快事五星聚奎周顒德中寶儼與盧多遜楊徽之同

爲諫官儼善推步星厯嘗曰丁卯歲五星聚奎自此天下始太平二拾遺見之儼不與也伊洛關閩之學已早見於立國之初矣燕山五桂千古稱之有餘榮焉洛下耆英亦極一時之望林間高閣花外小車是豈偶然有宋諸大儒表章前聖興起後學人謂周程張朱生於宋朱卻未食其報食其報者乃在乎明知言哉元祐黨人司馬光等一代元氣攸繫小人禍人之國必欲一網空之刻石於朝堂通三百九人二帝蒙塵諸儒僞學皆本於此張韓劉岳以武功著聲聲益著而國勢益促

讒死而宋室不可爲矣元有三儒耶律晉卿之止殺許
平仲之興學劉靜修之不仕皆有用夏變夷之意良工
心獨苦明高皇德比堯舜功過湯武一時開國功臣雲
從龍風從虎真是度越前代靖難兵至方黃諸公以高
皇培植之深受文皇殺戮之慘予謂正學亦有過焉明
主可與忠言正學以大義責之勢必不能從請早賜一
劍不食而死何至以一身累及八百餘人也白刃可蹈
中庸不可能處死之道豈容悻悻相業三楊楊榮楊溥
楊士奇忠臣三楊楊爵楊最楊繼盛理學五忠方孝孺

高攀龍鹿善繼劉宗周黃道周三異人傳方正學于忠
肅楊忠愍天啟之際隕身逆璫者十有七人高攀龍楊
漣左光斗周起元周朝瑞繆昌期丁乾學魏大中萬燝
周順昌袁化中夏之令周宗建李應昇黃尊素顧大章
劉鐸甲申之禍致命遂志者二十有一人范景文倪元
璐李邦華施邦曜王家彥孟兆祥凌義渠吳麟徵周鳳
翔馬世奇劉理順汪偉吳甘來王章陳良謨成德許直
金鉉孟章明陳純德申佳允茂寅高陽陷少師孫承宗
率其子舉人鈐秀才鎰尙寶孟鑰等五人孫大人從

孫八人皆死其婦女就義者三十餘人甲申神京陷保定守七日閩郡靖節光祿張羅彥進士張羅俊兄弟父子婦女就義者二十餘人

論史二則

從來史家如荀悅袁宏前後漢紀范祖禹唐鑑歐陽修五代史自成一書咸可法戒司馬光資治通鑑上起戰國下終五代先後貫穿而一千三百六十二年之事迹粲若指掌紫陽因之而成綱目事半功倍則司馬一生精力可謂不枉費矣自宋以下有李燾之長編劉時舉

陳桎之續編議者謂其紀載失次筆削未當薛應旂雅志紹司馬氏之事竭十餘年心力上下于宋元四百八十二年之間成一百五十七卷之書名曰宋元通鑑未獻之闕下尙藏之家塾元儒揭傒斯有言修史在于得人有學問文章而不知史事者不可與有學問文章知史事而心術不正者不可與世安得如薛氏其人者而與之論史哉嘗思宋亡于元明祖驅之漠北恢復中夏不以滅宋爲元人之罪而曰天命真人于沙漠卽位之明年遂詔修元史聖意淵微未可盡窺然國可滅史不

可滅則其較然者矣

明之成憲典章素切監觀率由之志因病臥窮山徵文
考獻兩無所據竟成虛念所見通紀吾學編大政紀本
朝紀事本末從信錄憲章錄暨零星野史數種其書又
皆散遺議者謂通紀倣編年而蕪鄙吾學編效紀傳而
斷落大政紀謂爲某相私書邇有同志相期欲共成四
朝實錄聾聵自廢不能執筆而往竊思此事關係甚大
念之爲公爲私人之或真或假天地鬼神實爲鑒觀愚
夫愚婦各有直道亦嚴矣哉春秋作于二千二百餘年

之前嗣其響者獨推綱目明祖有靈當有卓識大手任其責者矣

論餘

史可法金鉉朱之馮學者倚爲泰山時人謂無三君子便不成京師

崇禎間按臣祁彪佳請表揚吳下已故三舉人張基歸子慕朱陞宣皆贈翰林院待詔

常熟舉人顧雲鴻事後母至孝雲鴻死旬月母以哀卒後母殉其子古未行也學者謚爲孝毅先生吳江舉人

張世偉服習其祖基之訓生平孝謹友人題其銘旌曰
孝節先生吳縣生員楊大滌居父莊簡公喪竭盡誠孝
三年哀毀及嫡母生母亦如之居家訓子肅若朝典學
者稱爲端孝先生

文震孟弱冠舉孝廉砥節厲行垂三十年臚傳之日兒
童婦女皆目爲忠孝狀元遭逆璫之禍阤危瀕死僅而
得免劉理順久困公車法言矩行累成一個端疑正直
狀元故其殉國難亦只作飢食渴飲之常非矜激於意
氣者比

左羅石懋第呂豫石維祺黃石齋道周三人者生不同
地事不同操死不同致然其堅貞不易之心則一也其
殆中流之砥柱耶可稱鼎足三石

大兵下浙江原任巡撫邢彪佳赴池水死原任左都御
史劉宗周不食死有絕命詞云留此旬日死少存匡濟
意決此一朝死了我平生事慷慨與從容何難亦何易
門人會稽諸生王毓蓀聞變卽遺書宗周云願先生早
自決毋爲王炎午所弔投柳橋河死原任大學士高宏
圖流寓紹興野寺不食死

兵破義烏眾勸張國維入山國維曰誤天下事者文山
疊山也一死而已作絕命詩三章赴園池死興國公王
之仁載其妻子盡沈於蛟門下獨至松江見內院洪承
疇自稱仁前朝大帥不肖身泛波濤願來投見死於明
虞就戮西市

兵反桂林程式祖危坐署中適總督張同儼自靈川回
過式祖曰事急矣公將奈何式祖曰封疆之臣知有封
疆而已將安往儼曰公言是矣君思師義儼當共之遂
同被執

西華孝廉李邕和字寒石恥與眇逆同姓改李爲理遜
海外死寒石亦三石一流人

新城諸生王善眇逆西奔爲檄糾義旅禽僞令後爲
讐家信訐死於京師

雞澤諸生殷淵明倫堂讀討賊檄明大義於天下爲眾
執死之

貴池諸生吳應箕宣城諸生麻三衡俱戰死嘉定諸生
侯元演侯元潔被殺常熟諸生徐守質戰死崑山貢生
朱集璜城破被執不順死諸生陶炎自刎死華亭教諭

睦明永被執不順死常州諸生吳福之徐安遠入太湖
從黃兵兵敗福之投水死安遠被殺江陰屢攻不下至
三月乃尅遂屠其城典史陳明遇闔門投火訓導馮某
自縊明倫堂蘇州諸生顧所受服儒服哭文廟投泮池
死

百川橋下乞兒題詩橋上云三百年來養士朝如何文
武盡皆逃綱常留在卑田院乞丐羞存命一條元廟觀
前賣麪人夫婦對經死常州石生及賣扇歐姓者投西
廟池中死一鄉民賣柴入城聞安撫使至棄柴船躍入

文城埧南龍游河死五牧有蓄鵲鳥薛叟以薙髮自縊
死

吏科吳适辦事垣中鈔駁侃侃不憚權貴蔡奕琛阮大
鍼等同心排擠故御史張孫振有疏糾适爲東林嫡派
復社渠魁宜速正兩觀之誅

東林始自顧涇陽嗣後凡有儒術事功節義文章著聲
者大約皆東林人然有一正人自有一邪人與之對與
東林爲水火者沈四明王紹徽點將錄欲一網而空之
殺機已著至崔魏遂公行其殺之事夫善人國之紀也

善人云亡國何以立馬阮之殺東林其心愈毒矣程伯淳有言新法之行吾輩激成之當與分過東林諸公倘亦有犯此者乎請三復斯言

大兵破歸睢巡按御史凌綱死之姪潤生自縊綱遺書云願堅盟好勿輕南下否則楊子江頭凌御史卽錢塘江上吳相國也

大兵至浦百姓請出降按臣鄭爲虹不可再請行爲虹又不可未幾兵至眾迫跪爲虹不屈曰負國不忠辱先不孝忠孝俱虧我生何用求速死責輸餉虹謂清白吏

何處得金百姓爭欲代輸贖以不死虹以民窮財盡持
不可大喊奮躍奪刀遂見殺

自游張果中天啓元年左右光斗恩選士家貧不仕急左
魏之難義聲著海內甲申後客死蘇門

容城諸生侯保孫爾祚甲申後首致衣巾於學使者貧
不挫志庶幾不忘溝壑云

蠡縣諸生彭之燦甲申後徘徊河恥於苟食餓死蘇
門山之嘯臺

說

太極圖說

上天之載無聲無臭而萬物生此易之源也庖羲氏通
神明之德類萬物之情始設奇偶二畫以象之二畫錯
而八卦成八卦錯而四圖著圖之文不一陰陽消長之
象則一陰陽消長天地之變化也文王重之以盡其變
周孔繫之以効其動因時揅獎豈能於圖之外加毫末
及其久也意義繁而諸家之學競起徇于有者見動而
不見靜墮于無者見靜而不見動知易者鮮矣千餘年
後太極圖著而庖羲氏之圖益明無極者言乎其本無

聲無臭上天之載也無欲者言乎其功渾然與物同體
夫是之謂仁仁存則人極立順事畢夫是之謂合德濂
溪之言至矣橫渠西銘見其大者也誠敬存之未嘗致
纖毫之力則性定而內外忘明道所以發其蘊也庖羲
之後不容無文王周孔濂溪之後橫渠明道亦豈容少
哉此條脈絡牢契最微按詞章訓詁而求之將愈求而
愈遠矣

錯綜說

錯綜之說暢于來非自來創言之也孔子固言之矣曰

錯綜其數亦非孔子創言之矣伏羲圓圖一左一右之
形也雖未名錯而錯義已備文王序卦一上一下之說
也雖未名綜而綜義已備孔子目擊之而道存焉故曰
錯綜其數然亦未明言之也至矣鮮而始暢言之曰有
四正錯有四隅錯有四正綜有四隅綜有以正綜隅有
以隅綜正論象有卦情之象有卦畫之象有大象之象
有中爻之象有錯卦之象有綜卦之象有爻變之象有
占中之象皆抒千古未發其自謂孔子沒而易已亡若
至今日始明殆非虛語也愚竊有說焉畫前有易卦未

畫亦不見少有畫而卦辭爻辭彖辭亦不見少迨有卦
爻彖象之辭而始知其不可少也嗣後談易者漢惟子
雲宋則有堯夫至程朱則專主于理不論象數雖自云
止說得七分象失其傳然象之義俱在其中矣亦不見
其少也今矣鮮錯綜其數大闡前聖前儒未發之蘊易
云大備矣然易之蘊果盡于此乎非也造化之妙到底
有不盡之蘊義文言義文之言周孔言周孔之言程朱
亦各言其所言而已不知此不可以學易不學易不可
以入德

識吾說

吾與吾周旋久初不識吾也乃今恍惚識之猶未能遽
認也謂人不識人人易信謂吾不識吾吾亦難信初不
知吾實不識吾也吾有身天人參焉者也仰焉而無愧
於天者何在俯焉而無忤於人者何在不能令此身之
不愧不忤也而謂識吾乎吾有身志氣合焉者也帥焉
而無惡於志者何在充焉而無餒於氣者何在不能令
此身之無惡無餒也而謂識吾乎子曰吾十有五而志
於學此幼而識吾者也顏子曰既竭吾才如有所立卓

爾曾子曰吾日三省吾身此受夫子不倦之誨而始識
吾者也吾敢言識吾乎哉靜言思之吾不識吾人負吾
耶吾負吾耶仍乞靈於夫子從吾所好此識吾之路也
不識吾惡能從吾能從吾不患不識吾矣諸子各有吾
吾各有好亦第各從所好焉耳

醫隱說

從來高醫士之價者有曰不爲良相當爲良醫有曰不
爲相則爲將醫於二者兼之有曰非直與將相等有將
相不及者三夫醫一技耳何至與將相爭權又何至踞

將相之上其爲說曰相壽國醫壽人心相等也三軍五
旅舉而委之將四肢百骸舉而委之醫任相等也至相
與將位尊倨與人疾苦不相關醫偏惠及於愚夫愚婦
其不及者一將相邀虛功而冒實賞稱塞最難醫治人
病若已病德不望報報不厚責其不及者二將相不肖
或嫉賢妬能以快私憤醫於士君子倍爲保護其不及
者三噫醫有此三長宜何如愛已愛人可自藝其道乎
千秋而下高尙先生庶無愧色今有劉君元樸精五運
六氣之說亦如高尙以醫隱於金容余四十年例病藉

君不至狼狽君之三長余以一身全領之矣嘗有句云
地近河間復姓劉殆其後身乎

禱雨說

客問禱雨之說於理有諸曰有之曰極備極無天行已
定之數九年水七年旱堯湯不免何有干有司與士庶
哉曰堯湯水旱堯湯未嘗一日忘儆戒修省堯曰洊水
儆予湯以六事自責畢竟以人修天世際雍熙治成解
網若怠荒不恤天變何所恃以感格天心曰肅時雨若
日狂恆雨若洪範豈漫無所據而言客曰君爲天之子

感格猶易公卿大夫則疏矣士庶則又微矣格天事夫豈易言曰卿士佐君以治民鬼神代天以効用陰陽五行總此極至之理鼓盪流轉于天地間善感善應惡感惡應鄭俠繪圖以進曰請下臣言十日不雨斬臣頭以正欺罔之罪王良往謁陽明請於父不允其父令禱雨應而後允行二子禱雨而雨應者誠故也今六十日不雨禾盡槁士庶之禱雨千人萬人各爲性命無有不誠況邑侯賢而憂民其告虔于山川鬼神者已非一日四境合而應之合而感之顯微無間情理相通此亦必得

之數也客于是戢志肅容躬詣壇所而請命焉

存省齋說

袁君泰徵一日過夏峯以別墅存省齋索數言以識所
由蓋其大父梅村公曾有是額以爲存心省身之助嗣
伯父舜東公與其邑儒楊晉菴先生嘗共研席游泳憩
息於齋中厯有歲月今時雖屢易數椽久爲兵燹所殘
毀而存省之命意儼然在心目間是以因舊額而新乃
身心泰徵可爲大克家者矣夫學者精神渙散歲月空
擲石火電光方寸未嘗屬我故庶民之去與君子之存

其初止爭幾微而其流決江河塞四海遂至不可遏止
是沿其流益嘗究其源易曰成性存存道義之門其斯
之謂與至其功夫孔之內省會之日省把柄在手確有
持循日用飲食見天命流行功夫在是本體亦在是體
用一源顯微無間又何分靜而存養動而省察耶晉菴
爲中州山嶽君家前輩學有淵源君復以得之家傳者
與蘇門多士闡發之君之子若孫光裕先徽紹衣德業
唯存省之義殆無餘蘊矣

廣居軒說

魏子蓮陸方強仕之年卽以病乞歸名其讀書之室曰
倦飛取彭澤倦飛知還之意率母課子而外無他嗜也
歲丁未魏栢鄉公過其家與論學易其額曰廣居來問
其義余聞之躍然曰公之進蓮陸也深矣子抑知居之
何以廣乎孟子曰居天下之廣居自乾坤開闢堯舜湯
文而後此居之垣墉堂構未嘗增損非插藩樹棘而自
隘其居則東支西傾而自仆其居也繫解有曰窮大者
必失其居故受之以旅一身萍梗何處是歸宿之地畢
世戚戚不得不寄人籬下周茂叔教二程尋孔顏樂地

正要尋此廣居太極一圖居之基址以立訂頑一銘居
之涯際以達皇極經世出而居之消長成敗可見建安
集其成使學者窮理以知其廣格物以安其居陸子靜
宇宙一悟自幼而見居之大至陽明拔本塞源掃蕩廓
清而居之舊業遂復余嘗寤寐其地聖愚雖殊吾卽至
愚未嘗限以居之外窮通有分吾卽至窮未嘗限於居
之量禹稷顏子地不同而居同也能得其門便當知止
欲升其堂總在慎獨而凡言理言仁言性言誠言未發
言主一者皆我同堂共室之人俱當渾爾我異同之見

日日見有善可遷正與畫茅宵綯者同其乘屋日日見無過可改雖爲肯堂肯構其基早已自棄矣此居也與人俱生隨在而足在已不費在人不息當下便有廣大高明之象直於乾坤易簡中認出可大可久之業孔之疏水曲肱顏之簞瓢陋巷所謂樂在其中不改其樂天下萬世皆託以爲居安資深之地美富無窮晬盍自若故君子欲其自得之也栢鄉公名齋之意旨哉言乎

汝器字說

甲辰四月過保定選陸設款集諸同人子之瓚率其弟

行酒恭謹醇樸足稱令器蓮陸請予命字予曰汝器可
夫器所以適於用雖有大小貴賤精粗之不同須成器
矣然後可以論大小貴賤精粗也人之所以成人者亦
以其卓然有適於用然後自命爲人如無一才一德足
自見於世不亦醜焉爲人乎賜固稱達似不囿於器矣
夫子以瑚璉許之蓋所稱器之大而貴且精者也以語
君子之不器尙須有待此中之分數蓋不容一毫將就
冒認於其間智廉勇藝皆器也文以禮樂則無知廉勇
藝之可名令尹之忠文子之清皆器也歸之於仁則無

忠清之可名夷尹惠皆古聖人也以孔子較之亦器也
協之於時則無清任和之可名學者立必爲聖人之志
由有恆而善人而君子然後可優入聖域未嘗適道與
立而遽與之權能乎哉邇言學者舍窮理盡性而驟言
至命皆與未成器而高談不器者等子今爲士士之所
以爲士者非入孝出弟必信必果乎如士而不士猶觚
之不觚也孔子裁狂簡正欲鍊其器以大其用耳狂狷
者中行之器也善言者美大聖神之器也孔子謂賜與
回孰愈進賜於回以大其器賜未至回自不敢冒承而

襲取之子與氏姑舍是不同道此足見其器矣不成器者不必言而器之大小貴賤精粗其造詣豈容一槩論哉神而明之由器而進之不器者是在汝器自勉之汝器服庭訓能讀書知親有道余固樂有言請質之同人共聞其義

辯

渡江賦辯

先生此賦邱瓊山謂其爲幸宋之亡竟以此阻祀孔廟按先生之祖父五世仕金則於宋原非有故主故土之

誼也似不必苛爲求況此賦具在滿紙悲憤只爲不善
讀者以辭害意遂令先生之心不自於天下後世中間
設爲問答北燕處士涯南劍客總先生一體而兩名耳
先生曾受集賢學士以北燕處士稱則意可知已淮南
劍客四字丰采有爲急望得此人焉爲宋室吐氣正是
王景略不欲滅晉之意嗚呼噫嘻想夫陰山虎土茹毛
飲血狀若神鬼氣傲霜雪嬉於戰鬪業在征伐咆哮而
驅兕怒感激而風雲變顏崑崙而飜海浪折江河面崩
雷電川谷爲之蕩波邱陵爲之震眩此段極摹元勢之

强宋室立見難支故曰哀哉宋君可憐也戰則爲黃泉
之土降則爲青衣之奴上絕奎宮之運下失皇祐之區
草滿金陵鹿走姑蘇五溪焦土七澤邱墟何其痛哉此
段字字淚點點血而謂之幸乎客聞而笑曰信如公言
以謂遂無宋矣我長江所以限南北山川所以界封域
西接巫峽東至海陵臨谷爲塞因山爲嶂一人守隘萬
夫莫前我主彼客彼勞我逸彼雖有甲騎百萬橫屯北
岸安能飛渡我長江乎蓋言宋室規模形勢家當白在
只恐不能立定手腳故又有義士奮袂良將登壇既有

枕戈之劉琨豈無擊楫之謝安假祖逖以黃鉞之威拜
陸遜以都督之權而曹公赤壁之役苻融合淝之戰公
獨不聞之乎辭氣激昂多少激發人心處苻融合淝之
戰明以晉室予宋苻堅予元先生心事合盤託出矣見
旃裘而膽落夢遺窟而魂飛分明尊周之意至客於是
帖然失氣循牆匍匐口怯心碎不知所對滿腔酸楚不
能爲情真令人垂首喪氣憤悶欲絕爾幸之一字從何
處看出瓊山讀書破萬卷絕無以意逆志之意亦爲不
善讀書矣先生固不以不從祀爲恨祇以幸宋之亡一

語誣先生之心滋悠悠之口一言以爲智一言以爲不
智可不慎諸元世祖極嘆爲真古所稱不召之臣從其
志而不敢召不可謂非先生第一知己但夷夏君臣千
古爲昭不能用夏變夷豈遂以夷而滅夏耶先生此賦
爲集中第一文字紬繹其言而設身以處其地當自得
其苦心耳向遊關門曾以此說質之鹿伯順與愷陽先
生二公曰候事平後當繕疏八告以闡發三百年未暢
之旨惜未暇及此後之君子讀渡江賦者諒不乏孫鹿
二公之人敢請以愚言質之

議

修葺嘯臺安樂窩議

蘇門山水甲天下固不借靈於公和一臺堯夫一窩也
然蘇山蘇水不知閱幾千百年甯有幾公和幾堯夫哉
公和當晉季無妻子史氏稱之曰好讀易撫一絃琴性
無恚怒與嵇康數言深得大易之旨夫豈不言也哉其
默足容至公和方稱足色耳堯夫讀書百泉之上志堅
意苦夏不扇冬不爐夜不就席者數年窩者安樂蓋中
心安焉而後樂心不安則不得樂也夫安豈易言哉一

念之私一事之僞便有惡于志而疾于心者堯夫之樂
國卽孔顏之樂與此兩人者所稱千古士也予嘗薦蘋
藻思結異代之知俛首思之公和不言而我多言堯夫
窺先天之秘而我識閭若此者二子之所棄也然二子
雖予棄而我之歸依二子當益切故對遺像若親承教
旨焉今臺與窩創建旣久日見傾圯而蘇山蘇水未免
黯焉無色甯止愚昧無所仰承如思親亭聚遠亭皆在
百泉之上載在縣誌甚明今過求其跡多湮沒埋滅不
可考詢之士著皆恍然莫知其始嗟乎風雨所侵愈久

愈圯而復之愈難則臺與窩之終爲一亭也且有其勢
夫立亦瓦礫之墟厯數百年于今有顯則有晦有創則
有壞至壞矣然後待維且挽之者而後興豈不以其人
歟王按君亮教新學宮輝士永新晉宋兩處士之基費
十之三耳德且與蘇山蘇水並風教之存敢望諸大夫
之識治體者